

Phys. sp.

695

Phys. 1a. 695.



R

*Clarissimi*

BURCHERI de VOLDER,

Quæstiones

ACADEMICÆ


De

AËRIS GRAVITATE.



MEDIOBURGI,

Typis Viduæ REMIGII SCHREVERII,  
Anno salutis, 1681.



Classique

BURCHERI de VOLDER

Quintessence

ACADEMICA

De

AËRIS GRAVITATE

\*\*\*\*\*

\*\*\*\*\*

\*\*\*\*\*

\*\*\*\*\*

1711

Wien, bey der k. k. Hof- und Staatsdruckerei  
in der Vorstadt, bey der k. k. Hof- und Staatsdruckerei

Bayerische  
Staatsbibliothek  
München

# LECTORI

Philosopho.

S.

**E**xcellsa quadam & pulchra res est Philosophia, in ratione & experimentis Cautè Captis fundata. Verùm, an vulgi vitium non est, quod nunquam meliora quæ sunt multi sequuntur? Plurimorum phisicorum medicorumque Libros inspicias, hoc unicum tibi occurret Certum, pleraque non esse Certa. Petis dicti Veritatem? Mentis acie pervolve corundem Pagellas, nullaque tibi erit obvia, quin mendaciolo aspersa. Causam si desideras, Manifestissima est; quam plurimi enim jurantes in verba magistri, maluerunt hæc, illave principia pro rebus phisicis explicandis, nullis moti rationibus nuda auctoritate assumere, quam proprio Marte in iis demonstrandis Elaborare; hinc illæ lachrymæ? Hinc plurimis amicus Plato, amicus Aristoteles, amicus Epicurus, amicus Democritus, amicus Paracelsus, ami-

*cus Helmontius , amicus Carthesius & Pau-  
cissimis amica veritas ; Sed quod semel di-  
ctum , à quocunque enim fuerit Doctore ,  
fixum firmumque manet. Si quis igitur sibi ,  
seculo , & orbi præstare velit , latentisque  
veri viam quærere , prudenter de obviis du-  
bitet , donec evidens & invicta ratio sibi  
persuadeat veritatemque demonstret. Hæc  
regia illa via est , à qua si quis latum un-  
guem discedat , in maximo erroris versatur  
periculo. Verùm ne levioribus nostris , te  
diutius detineamus Lector benevole , notum  
tibi sit , quod veritatis studio & amore mo-  
ti Clarissimi nostri Philosophi Academicas  
hasce quæstiones tibi notas voluimus ; ut  
eas perlegendo scias , quam firmâ sit Phi-  
losophia recta ratione & experimentis ar-  
mata , quâ solâ sumus Philosophi.*

*Quæ-*

## M I C Æ

## VITATE.

S I.

uam firmiter  
 persuasum fuerit  
 omnibus ab om-  
 ni antiquitate Phi-  
 losophis, *Aërem*  
 nostrum, quem  
 haurimus, *levem*,  
 non *gravem* esse,  
 vel ex eo conjici  
 potest, quod hoc  
 ipsum nequidem  
 acutum fuerit. Imo  
*Aristoteli* ejusque  
*trinit*, huic funda-  
 tum sub Luna de-  
 cinam superstruere.  
*habita* fuit, nisi post-  
 quam

quam experimentis *Galilæi*, *Torricellii*, *Robertalli*, *Pascalii*, *Guericke*, *Boylæi*, *Hugenii*, aliorumque excellentium hac in parte viro-  
rum, gravitas ipsius aëris adeo manifeste demon-  
strata fuit, ejusque effectus adeo notabi-  
les animadversî, ut qui eam nihilominus ne-  
gare velit, non tantæ demonstrationum Ma-  
thematicarum claritati tenebras offundat,  
quam quidem suam in certissimis ratiociniis  
percipiendis prodat ignorantiam, tarditatem-  
que. Unde & diu mihi ambiguum fuit, hanc-  
cine rem mihi ventilandam susciperem, cum  
merito vererer ne soli lampada accendere vi-  
derer. Nec facerem, nisi animadverterem de  
levitate aëris à sensibus ortum præjudicium  
tyronum animos, quibus hæc scribuntur, ita  
occupasse ut vix evelli queat. Quibus ideo  
non ingratum fore censeo, si hoc ipsum paulo  
latius deduxero.

## II.

Qua in re, ut omnem verborum effugia-  
mus controversiam, præmonendum censeo,  
non id agi ut quærat de gravitate levitateve  
aëris ad alia corpora comparati, an nimirum  
aër levis possit dici si ad aquam & terram aliave  
corpora graviora conferatur, licet & ille gravis  
forte dici queat si referatur ad ignem ipso Aëre  
leviorem; quæ res tantæ est evidentiae ut non  
minus ridiculum mihi videatur eam, (quasi  
tam ineptus quispiam foret qui de ea dubium  
mo-



moveret,) experimentis aut rationibus operose ostendere velle; quam aëris, de qua hæc agemus, gravitatem certis ab experientia petitis, ratiociniis demonstratam convellere. Quanquam enim hoc effugium prima fronte speciem quandam veri mentitur, qua ab errore *Aristoteles* ejusque sequaces salvari possint, cum ille multis in locis expressis verbis asserat, nec aërem nec aquam simpliciter graves esse, *Α' ἀπὸς μὲν γὰρ εἶπεον ἰσχυρὰ καὶ βαρὺ. γὰρ μὲν γὰρ ἀμφοὶ καὶ ὀπίσσω, πρὸς δὲ βαρύτερα.* Simpliciter enim neuter eorum aut levis, aut gravis, ambo enim terra leviores, igne vero graviores. l. iv. de celo c. iv. & passim alibi. Facile tamen patebit attendenti quam frivolum id sit, & quam, si hoc admittatur, principia rerum sublunarium instabili nitantur fundamento. Eam enim ob causam si liceat Aëri levitatem assignare, quia levior terra, certe & licebit aquam levem dicere, quam tamen omnes gravem clamitant. Nec aqua solummodo levis erit, sed & terra, sed & metalla, & mineralia, imo omnia omnino corpora excepto solo auro, utpote quod omnium hactenus cognitorum est gravissimum. Quo ipso si forte præterea aliquod corpus reperitur gravius, actum erit prorsus de auri gravitate, idque quod jam sua natura grave audit, mox post talis, si forte detur, corporis inventionem, licet natura sua neutiquam immutatum sit, juxta hunc *Philosophicum* sc. loquendi morem de hoc gravi-

tatis folio deturbabitur, & dicendum erit leve Quo ipso non difficulter animadvertitur, gravitatem corporum hoc sensu sumtam: nihil de eorum natura determinare, quippe quâ manente eadem corpus possit ex gravi mutari in leve, & ex levi in grave: unde & illud clarum est, quam solidis & constantibus fundamentis superstruatur *Aristotelis & Peripateticorum de elementis rerum sublunarium doctrina*, utpote quæ si non in totum, magna certe ex parte hac gravitate levitateve nititur, quæ tamen, ut ostendimus, ipsorum corporum naturam non attingit.

Ut itaque planum fiat, quid sit id quod quærat, considerandum est, quicquid de hac comparata gravitate, levitateve sit, eam fuisse vulgatam eorum, qui *Peripatetici* dici voluere, nec eorum tantum, sed omnium ferme Philosophorum opinionem, aerem nulla vi externa compressum id agere, ut quantum potest, à terra ejusque centro recedat. Sic enim duo ipsis dicuntur elementa, *que ad medium duo que à medio*, quibus nihil est vulgatius. Ita ut in eo consistat controversia, an Aer, qui tellurem nostram ambit, quemque spiritu ducimus, premat tellurem & corpora in ejus superficie hærentia, an vero è contrariò à tellure, si posset, versus superiora recederet? Hoc enim si fiat levem Aerem jure meri-

ro, sin vero illud, eundem gravem dicendum esse non ambigimus.

## I V.

Hanc autem posteriorem partem multis experimentis quæ vulgo commentitio cuiuspiam vacui metui ascribi solent confirmarunt recentiores. Inter quos primum *Torricellius* non in hunc quidem finem, sed ut spatium inane ostenderet, tubo usus est vitreo, trium pluriumve pedum longitudine, quem ab altera solum parte apertum & mercurio repletum, aperto orificio post repletionem digito obturato, inversoque tubo, in aliud vasculum eodem mercurio refertum immisit ea lege, ut orificium tubi, antequam aperiretur, depressum foret intra superficiem mercurii in vase stagnantis. Quibus ita constitutis, remotoque digito, quid fit? Mercurius nonne quod expectandum videretur, sua gravitate ex Tubo aperto effluet omnis? præsertim cum in vulgata opinione nulla vis sit in aëre, huic descensui resistendo, imo è contrario videatur aër potius ei adjumento fore quam impedimento; nam quo delabitur plus mercurii, eo plus ascendit Aëris, qui motus ipsi fingitur naturalis. An vero providæ Naturæ jussibus obsecundans, suiique ipsius boni negligens, summo hoc sapientiæ gradu, quo plerique mortalium carent, prædi-

tus Mercurius in ipsa hærebit summitate? ne forte suo lapsu in summitate Tubi, ad quam Aëri aditus non patet, monstrum illud horrendum producat, quod *Inane* vocamus? Alterutrum certe horum fieri oporteret, si vulgaris Philosophiæ Natura inhaereret principiis. Verum illa harum legum prorsus oblita, nec sese ad commentitias Philosophorum regulas astringi permittens, mercurium deprimit, non quidem ad fundum usque, sed ad altitudinem 28. aut 29. digitorum circiter, ad quam eundem subsistere cogit. Quod profecto experimentum *Scholastica Philosophia* fundamenta non parum conquassat. Corpus enim tantæ gravitatis, quanta est mercurius aperto orificio, per quod possit effluere, ad eam altitudinem sustineri, sine ullo, quod sustineat, æquipondio, vel *nova* cujusdam intelligentiæ opus est, utpote quam, ut ex cælorum motibus addiscimus, eo in casu, quo causas rerum ignoramus, in subsidium vocandam suo nos exemplo docuit *Aristoteles*; aut forte *nova* quæpiam in hoc rerum statu forma mercurio adjumento est, ne lapsu graviore ruat.

V.  
Etenim quid est manifestius, nisi tale aliquod portentum in causa sit, Mercurium propter suam gravitatem non posse sustineri, nisi ab ipso aëre. Quid enim certius quam tubum ipsum, suis lateribus, ad hanc rem non conferre

ferre, quippe quæ non impediunt descensum ad dictam usque altitudinem? Neque yero mercurius, qui in vase stagnat, ulteriori descensui obicem ponet. Hic enim cum in æquilibrio sit cum omni mercurio in vase stagnante, qui in eadem est positus superficie, nihil habet virium quibus altiores in Tubo contentum mercurium sustineat. Quid igitur restat præter Aërem? Qui profecto neutiquam sustinebit mercurium, nisi habeat vires mercurii viribus æquales, & nisi impediat ascensum mercurii in vase, stagnantis eadem efficaciam, qua mercurius in Tubo contentus eundem ascensum promovet. Ex quo quid sequitur evidentius, quam Aërem externum deorsum premere mercurium in vase stagnantem, ne ascendat eadem efficacia qua ea pars, quæ in Tubo est, eundem ad ascensum sollicitat. Quæ certe mercurii in Tubo contenti pressio, si gravitas dicatur, cur non & illa, quæ in Aere est, huic, ut ostendimus, æqualis eodem nomine appellanda sit non video.

## VI.

Hoc autem ipsum non parum confirmatur eo, quod deinceps institutum est, examine, quo compertum est in montium altissimorum jugis Mercurium profundius delabi, quam ad radices, & in fodinis altius ascendere, quam in terræ superficie, utpote cum in montium jugis, propter altitudinem majorem,  
minus

minus aëris incumbat stagnanti in vasis mercurio, atque adeo ejus gravitas, quam oportet æqualem esse gravitati mercurii, minor necessario reperiatur. E contrario vero propter majorem aëris incumbentis quantitatem in terræ cavernis ejus gravitas major erit, propter quam & plus mercurii sustinebit; Ex quo & illud sequitur, si Aër quibusdam temporibus gravior reddatur, quibusdam levior, oportere Mercurium illis nŕdem temporibus vel minus vel magis deprimi, quod & fieri ipsa docet experientia.

## V I I.

Nec in hoc solo experimento, quanquam id sufficit, tota vis demonstrationis est. Innumera enim sunt ex quibus idem liquet quam certissime. Quorum quod primario mihi examinandum proposueram illud est, quod primum orbi literato, *Scotto* referente, proposuit *Otto de Guericke Consul Magdeburgensis*, qui duo hemisphæria avulsa separataque sibi invicem imposita, interjecta cæra conglutinavit deinde ex hoc concavo aërem ope Antliæ ad id ipsum præparatæ eduxit, quo ipso animadvertit tanta vi sibi invicem cohærere hæc hemisphæria, ut pro varia eorundum latitudine notabilis satis quantitas sive equorum, quibus utitur, sive appensorum ponderum, quæ aliquot centenæ libras in parva etiam exæquant latitudine, requiratur ad ea a se invicem

cem avellenda. Hoc illud experimentum fuit, quod ante annum & quod excurrit in *Theatro nostra Academia Phisico* publice exhibui, addito eo, esse hoc experimentum inter ea quæ ab *Amplissimo isto Viro* per scripta forent. Me enim & hujus & *Ilustr. Boylai* mentionem fecisse, iisque hujus rei inventionem ascripisse testes sunt ii, qui me prima vice prælengetem audivere.

## VIII.

Neque enim tacui per quos profeceram, cum id mihi honori semper duxerim, ea proponere quæ non ab obscuris quibusdam nominibus, sed ab illustribus hac in arte viris profecta forent. Neque vero putavi me majus quidpiam ad novi hujus Theatri commendationem proferre facile potuisse, quam promittendo me ea ostensurum, quæ tanti viri, suis curis, suisque monumentis indigna non censuerant. Antiquitatem vero mihi objectum iri non existimavi, præsertim non ab iis qui sese omnium novitatum osores profitentur acerrimos; neque meum esse duxi nihil hic nisi nova proponere, quia id ipsum, præterquam quod à nemine mortalium quantumcunque & ingenio & doctrina excellat præstari queat, à docendi munere prorsus sit alienum. Nonne inutile omnino præstaret operam Geometra, si ut tyrones artem doceret Mathematicam, non ad fundamenta, quæ  
jam

jam cognita essent, attenderet, non iis, quæ jam antea ex iis deducta forent, inhæreret, sed statim properaret ad ea, quæ non nisi ex penitissimis ipsius *Algebra* fontibus exsculpta, nulli hactenus cognita, sed ab ipso demum inventa forent? Quor non libri laudantur, & posterorum memoriæ suos commendant scriptores, licet aut nihil, aut parum admodum quod scriptori, tanquam inventori primo debeatur, contineant. Quæ certe si in libris non tolerentur tantum, sed & laudibus celebrantur, cum tamen libri non tyronibus, sed provectis & excellentibus doctrina viris scribantur, nullam rationem esse existimavi, eum id mihi, coram minus provectis dicenti vitio verteretur. Nisi forte quis putet neminem *Anatomicorum*, *Chymicorum*ve, ut & exemplis, quæ in experimentis consistunt, rem explanem, laudem mereri, qui jam vulgo cognita demonstrat, nisi totus in eo sit, ut nihil præter nova, à se primum reperta publico exponat. In quos si quis tantopere injurius esse velit, ut hoc ab iis exigit, eum rogatum velim, ut de se experimentum capiat, tentetque, & sæpius dicere & nihil præter nova & sibi demum inventa dicere. Quod si faciat, aut ego vehementer fallor, aut citissime obmutescet.

Verum



## IX.

Verum ad rem ut redeam, à qua paululum digressus sum; admirandum hujus rei effectum existimavi tum temporis deberi aëri ejusque gravitati; cujus opinionis causas & demonstrationem exposui; Non quidem quod ita deliraverim, ut putarim paululum istud aëris eductum tantæ esse gravitatis, ut illud pondus sustinere queat? Quis enim cui vel minimum sanæ mentis tam absurdæ opinionis est capax? Quam profecto qui magnis illis viris, qui ab aëris gravitate, tanquam hujus effectus causa stant, affingit. præterquam quod in eos admodum injurius est, non absimilis videtur *Hermotimi* præceptoribus apud *Lucianum*, qui adversariis ea tribuebant, quæ destruere non foret arduum in quibus; id fieri solet quod ait, ὁμοίον αὐτοῖς τοῖς τῶν παιδίων οἰκοδομήμασιν, ἃ κατὰ πειρασμοὺς αὐτοὶ κτάνῃ, διὸ καὶ ἀνατρίπτουσιν, simile esse puerorum adiculis, quas illi infirmas construunt, & protinus subvertunt; Fingunt nimirum sibi dogmata, non quæ ab adversariis contra quos agunt, admittantur, sed quæ putant facile everti posse, ut sic si veræ victoriæ compotes fieri nequeant, ejus tamen speciem nanciscantur eaque imperitis imponant. Quamquam profecto id de quo nunc agimus commentum ruditer nimis effectum est. Cui enim quæso persuadebunt ullum re-

periri

periri mortalium tam stolidum, tam ineptum, tam ab omni ratione alienum ut putet ærenam in paucula hac sphaeræ cavitate contentum, quæ cavitas ne decimam quidem illius ponderis partem, quod appenditur, poterit capere, isti ponderi gravitate æqualem esse? Eadem sane opera persuadebunt omnes illos Helleboro indigere & ad Anticyras ablegandos esse. Verum cum hæc figmenta supinæ debeantur eorum, quæ hac de re à multis & scripta & demonstrata sunt, ignorantia, illa ipsa statim evanescent, ubi quo pacto Aër sua gravitate hunc effectum præstet ex primis principiis, quanta possim perspicuitate deduxero, quod agam proxima Disputatione.

## X.

Quod multis non intelligantur ex demonstrationibus, quibus conficitur firmissimam cohaesionem, qua duo hemisphaeria solâ cerâ interposita sibi invicem agglutinata, Aëre educto connectuntur, soli Aëris gravitati deberi, nullam aliam ob causam fieri putem, quam quod leges gravitatis quas inter se fluida quævis corpora observant ab illis ignorentur; si enim existiment eosdem effectus à gravitate fluidorum corporum sequi, qui à gravitate fluidorum fiunt, non mirum certe est, si hic error eos à demonstrationibus, ex legibus fluidorum corporum mechanicis deductis per-

percipiendis avertat : ut itaque rem hanc clare cognoscamus , videamus quæso unam aut alteram legem fluidorum corporum , quæ ad nostrum scopum conferent admodum.

## X I.

Prima sit, *In fluido quovis stagnante unamquamque fluidi superficiem horizonti parallelam aqualiter premi.* Altera vero, *Si Superficies quavis fluidi horizonti parallela inequaliter prematur, partem magis pressam expellere eam qua premitur minus.* Quæ sane leges ejus sunt evidentiae, ut eas Archimedes supponere sine ulla demonstratione veritus non fuerit. Sic enim ait in libro *περὶ ὀγκομέτρων*. *ὑποκρίθω δὲ ὑγρὰ πτωχεύει φύσιν ἑμὴν, ὥστε τὴν αὐτὰ μέρων ἐξ ἴσων κερμάτων, καὶ σωιχομένων ἐπ' ἀλλήλων, ἰσάτοιο πιπυσμένων ὑπὸ τῆς μάλλον πιπυσμένης ἐκβάλλειν* Ponatur fluidi eam esse naturam, ut partiōis ejus aqualiter jacentibus, & continuatis inter sese, pars minus pressa à magis pressa expellatur. Hisque iisdem fundamentis usi sunt Galileus, Stevinus, Boyleus in hydrostaticis, uno verbo omnes rerum Hydraulicarum scriptores.

## X I I.

Et sane hujus effati veritas ex fluidorum natura fluit evidentissime. Nonne enim, ea hoc sum proprietas est ut vel minimæ cuivis cedant pressioni? Immittat quis sine ulla vi aut impetu manum in aquam; nonne con-

festin aqua cedit manui, & contra suam, ut vulgo creditur, naturam ascendit? Imo ne ab experientia id ipsum petere solummodo videar, nonne hoc omnium fluidorum commune est ut partibus consent exiguis, à se in vicem separatis, & in quasilibet plagas mobilibus? Nonne & ex eo sequitur sive ab ipsa fluidi natura, sive ab externa causa id fiat, facile unis ejusdem fluidi partibus motum longe diversum imprimi posse, quam aliis? Cum enim agatur solummodo de separatorum à se invicem & insensibilium quorundam propter exiguitatem corpusculorum motu & agitatione, quis non videt hunc illumve motum facile quibusdam fluidi partibus imprimi posse, qui non imprimatur aliis, à prioribus omnino sejunctis avulsisque? Quibus certe consentaneum est, si fluidi quædam superficies stagnet, id est, tota sui mole nec in hanc nec in illam feratur partem, illam ubique locorum necessario æqualiter comprimi oportere. Nam si ponamus, quoddam esse in ea superficie spatium, quod reliquis ipsi æqualibus, & in eadem superficie politis, prematur vehementius, nonne certum est hanc vehementius pressam partem, à reliquis partibus ex natura fluidi separatam, obsequituram necessario vehementiori pressioni? Si enim hæc perpetua naturæ lex sit, ut causa valentior effectum suum sortiatur & debiliori causæ prævaleat, necesse profecto est, ut pars  
hæc

hæc pressa efficacius, aliam minori vi & robore compressam suo expellat loco, sic majori cedat pressioni.

## XIII.

Concipiamus aquam quæso in vase stagnantem, supponamusque, si id fieri queat, aliquam superficiei partem à quacunque demum id fiat causa, deorsum premi vehementius quam reliquas ejusdem superficiei & priori æquales partes. Utraque hujus aquæ pars tam ea quæ efficacius quam quæ debilius premitur, deorsum tendit. Utraque tamen simul deorsum ruere non potest. Quid itaque fiet? Manebuntne hæ aquæ partes in eadem superficie? Verum hæc ratione causa efficacior non prævalebit debiliori, pressio major æqualis erit minori, quo quid absurdius fingi potest? Quid igitur? Id scilicet, quod res ipsa clamat, ut pars quæ efficacius premitur descendat, assurgatque ea, quæ premitur minus, donec hæc ratione aucta hoc ascensu vi istius pressionis, quæ debilior fuit, & debilitatâ ejus efficaciam quæ fuit valentior, res demum ad æquilibrium reducatur, & in eo consistat. Simili nempe ratione cum duobus hisce, quas in aquæ Superficie imaginamur partibus pressis inæqualiter sese habet ac cuna duabus lancibus ex eadem libra suspensis. Ut enim earum altera non descendet nisi ascendente alterâ, ita in hoc vase stagnantis aquæ, altera ejus pars non labetur deorsum, nisi al-

tera sursum moveatur. Ut autem ea lanx necessario descendit, alteramque assurgere efficit, quæ majori premitur pondere, sic sane & ea pars aquæ, quæ majori efficacia deorsum pellitur, descendit, & per consequens ad ascensum cogit alteram aquæ partem, quæ utpote imbecillior huic alterius partis descensui non est resistendo. Ut denique tum demum statera in æquilibrio hæret, quando in utraque lance eadem est pressio, sic & aquæ Superficies tunc demum in eadem ubique consistet altitudine, quando omnes ejus partes æqualiter pressæ sunt, nec potest idcirco altera alteram ex loco, in quo est, expellere.

## X I V.

Hiscæ autem consequitur, si forte artificio quopiam id effici queat, ut pars quæpiam aquæ depressior existat, pars sublimior, partem illam depressiorem tanta vi versus superiora pelli, quanta est ea, qua partes superiores versus inferiora feruntur. Sumamus cylindrum concavum aëre plenum, altero orificio aperto, altero obturato in aquam mitti, orificio obturato versus inferiora posito, nonne manifestum est si hic tubus cylindriceus, ad 5. pedes in fra aquam deprimatur, superiori orificio aperto extra aquam eminente, magna vi, imo omni gravitate istorum 5. pedum ab aqua subjacente versus superiora premi oportere? Quod ipsum certe fieri non posset, nisi aqua proxime inferius tangens orificium & fundum

Tu-

Tubi, omni vi & gravitate lateralis aquæ versus superiora premeretur? Si enim nulla gravitate, pressioneve deorsum rueret aqua, quæ à lateribus est, nec illa aqua quæ fundo subjacet ulla vi superiora versus deducetur. Ex quo id notari velim, in fluidis corporibus motum gravitatis quasdam deprimendo fluidi partes alias attollere, eadem vi quæ reliquas deprimit, unde conficitur non omnem superiora versus motum gravitatem tanquam causam excludere.

## X V.

Ex quibus sequitur non esse quod quispiam imperitior forte cogitet pressionem illam qua in nostram sphaeram per orificium inferiori loco apertum irruit aër, *quod hic bene observandum*, forte quis putarit (& revera observandum est, non quod ad gravitatem destruendam quicquam faciat, sed quod observatoris hac in re imperitiam planam reddat & perspicuam) non posse *gravitati adscribi, cum gravia non adscendant sponte, sed descendant*; ut enim manifestum est aquam inferiori Tubi orificio subjacentem, à sola gravitate lateralis Aquæ fursum pelli, & revera si quædam ipsi via per inferius orificium pateat, hac unica de causa ascensuram. Ut etiam constat pondera in bilance posita utrinquæ gravia esse, & tamen propter majorem ejus quod in una lance est ponderis gravitatem quam ejus quod in altera, alteram descendere. Sic

& eodem jure constare potest aërem isti orificio. Sphæræ aperto subiacentem Sphæram invadendo ascendere propter gravitatem pressionemve atque adeo descensum aëris positi à lateribus. Qui idcirco aëris ascensus quæve superiora versus irruptio in Sphæram non minori jure aëris gravitati ascribetur, quam adscribitur gravitati aquæ, quod per inferius Tubi cylindracei irrumpat orificium, vel quod lanx quæ multas sustinet libras ascendat tamen, propter alterius lancis majorem gravitatem.

## XVI.

Quæ ut scopo nostro applicentur, concipiamus binos aëris cylindros, quarum latitudines & inter se, & cum ea quæ est nostræ Sphæræ accuratissime æquales ponantur, ab ipsa telluris superficie ad ultimos usque Athmosphæræ limites extensos. Facile autem est percipere unamquamque horum aëriorum cylindrorum superficiem modo horizonti parallela sit, & in æquali altitudine, premi necessario æqualiter, cum æqualem aëris quantitatem & pressionem supra se undiquaque sustineant. Ponamus porro in horum cylindrorum altero suspendi duo hæc sibi invicem cerâ conjuncta hemisphæria, aëre adhucdum referta. Manifestum est, utramque tam internam quam externam hujus Sphæræ superficiem æqualiter ab aëre premi, eo quod internus ille aër æque ac externus condensatus sit.

Neque



## XVII.

Neque obstat, parvula illa aëris quantitas quæ in Sphæra est, quæ vix videtur tanta vi premere posse internam quanta immensa aëris externi moles externam premit Sphæræ superficiem. Etenim si rem rite consideremus, nulla pars aëris agit in Sphæram, nisi ea quæ eam tangit proxime, quæ tamen eo agit efficacius, quo à mole superioris aëris validius comprimitur. Unde si artificio quopiam fieri posset ut aër externe Sphæram ambiens æqualiter ac nunc comprimitur, etsi nullus aër superior eum comprimeret, nonne manifestum erit hunc Aërem licet in minori copia, quia tamen æque compressus supponitur ac si omne pondus totius Atmosphæræ sustineret, æquali vi acturum in ipsam Sphæram. Ex quo sane conficitur non tam aëris quantitatem quam ejusdem compressionem magis minusque validam spectandam esse. Hæc autem cum æqualis sit aëri in Sphæra contento, cum eo qui extra Sphæram est, quid est evidentius quem utriusque vim & actionem in Sphæram æqualem esse? Cui consequens est hoc in rerum statu ad separationem efficiendam nihil aliud requiri, quam ut parvula ea, quæ per ceram est connexionis vis & efficacia superetur vincaturque. Ea enim aëris superficies quæ infra Sphæram est, æqualiter premitur cum

superficie aëris laterali , nisi quod Sphæræ pondus addat huic cylindro aliquod præpondium.

## XVIII.

Verum educto jam aëre , quid quæso fiet ? Externa Sphæræ superficies eandem habebit , quam antea , ab aëre pressionem ; pauxillum enim illud educti aëri hic in censum , suam ob exiguitatem non venit. Verum interna superficies educto aëre nihil habet quo resistat. Unde quid sequitur evidentius , quam cum aër immediate subjacens inferiori hemisphærio à gravitate aëris lateralis superiora versus feratur , nec quidquam in Sphæra sit quod huic pressioni resistere valeat , oportere sane hoc hemisphærium ad alterum quod eadem aëris superioris vi & gravitate deorsum premitur comprimi , tota vi & pressione subjacentis aëris , quæ cum tota dependeat ab ea qua Aër lateralis deorsum ruit gravitate ; quid est certius quam omni hujus gravitatis vi & impetu , hæc hemisphæria ad se invicem compelli ?

## XIX.

Quod ut clarius intelligatur , in binis nostris cylindris aëriis , in quorum altero suspensa hærent duo hemisphæria , consideremus eam aëris superficiem quæ immediate tangit inferius hemisphærium . Nonne altera pars  
hujus

huius superficiei quæ Sphæram non continet sustinet omnem pressionem & vim totius aëris ad ultimos usque Athmosphæræ limites? Altera vero pars in qua Sphæra est, nonne ab omni illa pressione redditur immunis? Etenim per eductum aëra hiatus quasi quidam in hoc cylindro efficitur, per quem superioris aëris pressio inferiorem attingere nequit. Ea enim tota in superius hemisphærium terminatur. Quid itaque ex prædictis Hydraulicorum legibus sequitur? cum fluidorum partes magis pressæ, expellant minus pressas, aërem in laterali cylindro & in ea ejus superficie, quæ æqualis est cum aëre Sphæræ subjacenti à terra distantia, omni gravitate totius Athmosphæræ pressum expellere ex suo loco superiora versus aërem hemisphærio subjacentem minus pressum, utpote ab Atmosphæræ pondere hoc artificio immunem, idque ea pressio atque adeo id pondus quod sustinet lateralis aër, deorsum ruit. Quæ itaque superiora versus aëris propulsio, ut nulli alii causæ quam aëris ascribenda gravitati, ita & huic soli tribuenda ea firma vis connexionis, quæ in hemisphæriis observatur.

## X X.

Quam tamen ut tollamus quid quæso aliud juxta prædictas mechanices leges requiritur, nisi ut efficiamus ut pari pressione cum latera-

lateralis deorsum prematur aër Sphæræ sub-  
 jectus. Quod certe fiet, si appendatur hemis-  
 phærio inferiori lanx, eique imponantur tot  
 pondo quot laterali aëris gravitati, ejusque  
 pressioni æquentur. Quo ipso aër in eadem  
 cum Horizonte parallela superficie æquali-  
 ter pressus stagnabit, nec superiora nec in-  
 feriora versus movebitur. Quod si vel tantil-  
 lum addatur ponderis, illud cum sustinere  
 aër subjectus jam magis vicino pressus ne-  
 queat, necessario eo aëre cedente decidet,  
 & hemisphæria à se invicem avellet.

## X X I.

Neque vero ullam aliam hic causam fingi  
 posse patebit evidentissime. Aut enim hæc  
 connexio fiet ab ipsa cera intermedia, aut  
 fiet à materia quæcunque tandem ea sit, quæ  
 in aëris educti succedit locum, aut denique  
 fluet à causa externe ambiente, quæ præ-  
 ter aërem circumjectum potest esse nulla. Ce-  
 ram nemo, ut opinor, sanus dixerit, utpo-  
 te quæ eodem ritu vim suam exercet sive plena  
 aëre, sive ab eodem vacua sit Sphæra. Neque  
 in materiam intus in Sphæra contentam facile  
 quis hujus effectus causam conjiciet. Ea enim  
 materia cum per poros ipsius Sphæræ succedat,  
 per eosdem libere moveri, libere fluere potest.  
 Et qua quæso quis ratione concipiat, mate-  
 riam aëre tenuiorem, fluidiorem, atque adeo  
 etiam leviolem posse tanta soliditate internas  
 ho-

horum hemisphæriorum partes inter se connectere? Quo pacto externa undiquaque pressio corporum cohæſionem promoveat, facile est perceptu, sed quo pacto id ipsum interne fiat, nisi hamis uncivæ partes sibi implicentur, quos tamen in fluido hocce corpore nemo sibi imaginetur, me quod attinet nulla ratione intelligo. Quid igitur quæſo reſtat præter externum aërem, qui eam cohæſionem efficere non poteſt. Niſi Hemisphæria ad ſe invicem comprimendo. Quæ ſane aëris preſſio non ſuſtineret tantum ponderis, quantum abſque avulſione ſuſpenditur, niſi ponderis preſſione & efficacia foret major. Nam quid certius quam eam quæ validior eſt cauſam effectum ſortiri, Aër ſua vi comprimit ad ſe invicem hemisphæria, pondus appenſum ſua divellit efficacia. Quid itaque? ſi aëris vis ſuperet ponderis efficaciam, conjuncta hærebunt hemisphæria, ſi vero è contrario pondus appenſum majori impetu avellat quam connectit aër, avellentur neceſſario à ſe invicem hætenus connexa eadem Hemisphæria.

## X X I I.

Hæc autem aëris preſſio ſuſſum, cum, ut ex prædictis conſtat, debeat ſe vehementiori deorſum preſſioni aëris lateralis eam ſane ab aëris gravitate fluere negare poterit nemo.

Quan-

## XXIII.

Quanquam eam, quam *præced. disput.* adduxi demonstrationem ex legibus Mechanicis deductam quam clarissime evincere existimo firmitatem cohæſionis, quæ in duobus hemisphæriis aëre educto oritur, aëris pressioni ejus gravitati respondentem deberi: Quanquam certus sum eum, qui priora intellexerit, & vel tantillum in Mechanicis versatus fuerit, facile suo Marte omnes exceptinculas quæ contra hanc demonstrationem adferuntur discussurum, volui tamen hac vice id tædium, quo debilioribus, & nimium forte præjudiciis excæcatis ingeniis inservirem, in me fuscipere, quod ex refutatione similium ineptiarum homini non nimium otioso necessario exoritur.

## XXIV.

Duplicem itaque nonnulli exceptionem parant, quarum altera negant hanc connexionem pressioem aëris causam habere: altera vero si vel maxime aëris pressio causa sit connexionis, ex ea tamen male aëris gravitatem concludi asseverant. Prius confirmant demonstratione, si Diis placet, Mathematica, quia cum in omni motu fiat circulus, necessario materia quæpiam subtilior succedet in locum aëris, eductusque aër vicissim locum, quem subtilis materia Sphæram ingressa reliquit, occupabit. Ex quo quid sequitur? id nimirum aërem cum satis spatii in quod se recipiat habeat pressioem

non

*non facere.* Bella profecto demonstratio, cujus ut vires & Geometricam ratiocinandi viam quis cognoscat, lubet simillimo exemplo, quodque evidentissime verum demonstrationis hujus valorem patefaciat eam illustrare.

XXV.

Revocemus igitur nobis in mentem, tubum nostrum, de quo §. v. *præc. disp.* ab altera parte apertum, ab altera clausum, qui in vas quam continens demittatur, concipiamusque primum Tubum hunc concava sui parte aquâ refertum, ita ut aqua ad eandem altitudinem tam internas quam externas Tubi partes cingat; Deinde concipiamus ope sive incurvi siphonis, sive antliæ aquam è tubo evacuari succedente aëre. Huic jam quæso rei applicemus egregiam nostram demonstrationem; *In omni motu sit circulus; In locum itaque aqua succedit Aër, expulsaque aqua occupat locum, quem aër tubum ingressus reliquit.* Unde sequetur juxta vim prædicti ratiocinii, *aquam cum satis spatii, in quod se recipiat, habeat, pressionem in Tubum non facere, omne idē dāzay.* Estne ovum ovo similis quam hæc demonstratio illi? Nonne enim ut primum aqua dum & interna & in externa Tubi parte est, nullam sensibilem nobis pressionem facit, nec Tubum sursum magis quam deorsum impellit, cum altera pressio alteram tollat, interna externam, cui requi-

æquipollet; sic & aër tam in interna quam in externa hærens Sphæræ parte effectum nullum exhibet; nec hemisphæria ad se propellit, dum utriusque pressionis tam internæ quam externæ vires non secus ac illæ aquæ in æquilibrio sunt? Nonne deinde, ut sublata ex Tubo aqua succedit aër, aqua subtilior eadem ratione sublato ex Sphæra aëre, succedit materia aëre subtilior, utpote quæ Sphæræ poros potest pervadere. Nonne denique ut educta ex tubo aqua, occupat locum quem aër derelinquit, eodem ritu eductus ex sphæra aër eum locum occupat quem deserit materia subtilior, quæ Sphæram ingreditur; Quid igitur; Nonne pari evidentia, qua sequitur aërem quia qui ex Sphæra educitur sat illic spatii reperit in quod recedat, Spæram non premere; Nonne, inquam, eadem evidentia sequitur aquam, quia ea quæ ex Tubo educitur sat spatii illic reperit quod occupat non premere ipsum Tubum?

XXVI.

Et certe quis non miretur, huic demonstrationi quæ tam clare, si credere fas sit ostendit nec Sphæram ab aëre nec Tubum ab aqua premi experientiam repugnare. Quæ stolidus ego (qui, ut ingenue fatear quod res est, ratiocinii hujus subtilitatem non assequor, aut si assequar, futilitatem simul deprehendo) persuasus opinabar; non secus ac ille tubus nullam ab aqua pressionem sentit,



tit, quando interne æque aquam ac externe habet, ita quoque Sphæram ab aëre non premi, ubi tam ab interna quam ab externa parte æque compressum habet aërem. Eademque stoliditate inductus æque ac demta ex tubo aqua, succedente aëre ipsa aqua multo minus gravi, omni gravitate aquæ premitur versus superiora tubus, credidi, demto aëre, succedenteque materia subtiliori ipso aëre multo minus gravi, (si modo ullius gravitatis sit particeps, quod hic non determino) hemisphærium inferius omni gravitate aëris versus superius propelli. Quod superius cum ab eadem gravitate deorsum pellatur, putavi demens huic hemisphæriorum ad se invicem pressioni cohesionem hanc deberi.

XXVII.

Verum fallor fortasse, cum eadem experientia ostendat, nullam hic aëris pressionem esse, utpote *que ab astantibus non animadvertatur, quod si tamen fieri oporteret præsertim cum eductus aër in totum conclave se exoneret.* Bone Deus! Quid hoc monstri est? Est ne quispiam tam stolidus ac omnis mentis expertus, ut sibi persuadeat tantillulum illud aëris quod ex Sphæra educitur, aërem externum ita coarctare ut inde hæc pressio exoriatur? Hoc certe quod educitur ad compressionem aëris nihil facit; pauxillulum enim illud non cum aëre tantum qui in conclavi, sed cum tota aëris massa

massa communicatum quid potest? Unde igitur pressionem sentirent astantes, cum aër evacuata sphæra non coarctetur magis, quam eadem repleta. Deinde tantum abest ut astantes modo undique ab aëre cingantur, eam pressionem possint animadvertere, ut facile sit ostendere eam pressionem sensibilem non reddi, si vel aër multo gravior compressiorve foret. Homo ponatur infra aquas, ita ut ab aqua undique cingatur. Nullam tamen ille ab aqua pressionem sentiet. Estne igitur aqua non gravis? an vero ea ipsa aëre minus coarctata compressave est? Quorum si neutrum obtineat, quis non videt pressionem aëris procul omni dubio aqua multo minus compressi, multo minus gravis ab astantibus, modo eos undique cingat ambiatque sentiri non posse, si enim aqua gravior compressiorve id non potest, certè nec aër poterit.

## XXVIII.

Verum redeamus quæso ad Tubum nostrum qui totam rem explanabit quam clarissime, & in aqua procul omni dubio gravi omnia eadem, quæ in aëre fiunt evenire ostendet. Immittatur ille non in parvulum aliquod vas, sed in totum Oceanum; educatur ex eo aqua, nemo erit, ut opinor, pauxillulo hocce aquæ immensa aquarum moli addito, qui putabit hinc aut aquam magis comprimi, aut ejus vires notabiliter augeri. Eodem modo nec ille  
aër,

aër qui ex parvula Sphæra educitur, & cum universa aeris massa communicatur, ad ejus majorem compressionem, aut augmentum virium quidquam poterit. Supponamus nunc porro hominem quempiam juxta Tubum hunc in aqua natantem aut sub aquis demersum, ille certe ut pressionem aquæ nullam sentit, sic nec Sphæræ nostræ astantes & ab aëre undique cincti, ullam pressionem, sentire queunt, si vel aër centuplo millecuploque foret, densior graviorque. Ex quo patet quam facile sit iis qui à vera ratiocinandi via deflectunt nec Mechanicas leges intelligunt, circa has res inpuendos errores delabi. Si enim ex eo quod astantes pressionem non sentiant, sequatur aërem Sphæram non premere, sequetur sane nec Tubum huncce sursum ab aqua premi, quia is qui juxta natat pressionem non sentit, quo quid absurdius?

## X X I X.

Verum ut pateat simul & quam imperite de hisce rebus loquantur, qui aeris hancce pressionem & gravitatem impugnatam volunt, & quando pressio illa debeat animadverti, age excutiamus hujus effecti manifestam causam. Consideremus hunc in finem bilancem ex æquilibrio suspensam, ita ut utriusque lanci mille imponantur pondus. Supponat quis uni lanci manum. Proculdubio nullam pressionem sentiet. non quod illa lancæ

non omni suo pondere deorsum ruat, sed quod huic deorsum pressioni obsequi nequeat, quin altera lanx paribus ad descensum viribus pollens assurgat. Qua ratione dum hæ vires sibi invicem impedimento sunt, neutra lancium vel ascendit vel descendit, neutra suppositam manum vel minimum premit. Eadem ratione aquæ aut cujuscunque alterius liquoris quæ in vase stagnat, una pars nequit descendere, quin ex altera parte tantundem aquæ ascendat, quæ cum parium cum priori sit virium, huic descensui obicem ponit, efficitque pressions æqualitate, ut duæ quælibet aquæ partes ejusdem altitudinis ejusdemque quantitatis suas invicem premendi vires tollant & in æquilibrio sint. Ponatur nunc porro infra hasce aquas corpus quodcunque, id sane descendere nequit ea pressione, qua aqua superior imminet, quia dum descendit tantundem inferioris aquæ, & parium idcirco cum superiore virium ascenderet. Hinc si vel descendat vel ascendat, id non fiet à pressione ipsius aquæ, sed ab excessu gravitatis levitatisve quo aquam illud corpus superat. Cui consequens est, hanc aquæ pressionem cum in æquilibrio sit à manu aut corpore nostro aquis supposito nequaquam animadverti posse. Quæ demonstratio non tantum in aquis locum habet, sed in fluidis quibuscunque corporibus aqua sive levioribus sive gravioribus, sive minus sive magis compressis. Non enim nititur

ea peculiari aquæ natura; sed universali lege gravitatis & natura fluidorum corporum.

## XXX

Quod si vero manu, ni lanci statera in æquilibrio constitutæ supposita, ab altera lance aliquid tollatur ponderis, nonne manifestum est confectum, manum pressionem ex descensu istius lanceis sensuram, eamque pressionem, quæ ponderis excessui respondeat? Cum enim detur in illa lance, cui supposita manus est, descensus vis, imo cum ipsa lanx revera descensura sit, nisi imperum descensus ab excessu gravitatis ortum sustineat manus, quid certius quam manum eam pressionem sensuram qua descendit lanx & quæ æqualis est ponderis excessui? Eodem ritu si manum applicemus fundo vasis, nulla illi facta apertura, aut eadem ratione omnibus clausis applicemus Sphæræ, quâ applicatione nemo sibi persuadet omnem aquam aut aërem intermedium tolli, nullam sentiet pressionem, cum aqua, quo fluat non habeat, nec descendere atque adeo nec premere queat, nisi tantundem aquæ ascendat, Sed si facta apertura, ea manu obturetur, nonne patet in vase referto aqua, aquam descensuram nisi manus impedimento foret, & in locum aquæ ascensurum aërem, virium multo minorum. Unde cum ab una parte aqua manui incumbens deorsum premit manum, ab altera vero parte aër huic

pressioni resistere, aut eam tollere nequeat, quid certius sequitur quam aut descensu aquam aut manum sustinere oportere excessum pressionis, qua aqua majori premitur quam aër, hoc est sustinere oportere omnem gravitatem aquæ. Eodem ritu, quamdiu manus orificio Sphæræ clauso imponitur pressionis nullam percipit vim, verum eodem aperto, cum ab una parte aëris pressionem sustineat toti lateralis aëris ad Athmosphæram usque extensi pressionem æqualem, ab altera vero habeat materiam subtiliorem per omnes poros transeuntem, atque ideo nulla pressionis vi agentem quid manifestius quam eo demum in casu, & non aliter juxta leges mechanices manum interiora versus premi posse, & gravitatem aëris animadvertere? Quæ vis pressionis eo major est, quo orificium per quod aër in Sphæram illabitur est majus. Quod cum in nostra Sphæra admodum parvulum sit, nec illa pressio tantæ est efficacix, quin facile à manu sustineri queat. Eo vero orificio majori reddito quid fiet? Id nimirum quod in sua Sphæra 60. aut 70. mensuras Magdeburgicas continente refert Amplissimus Vir Otto Guericke, experiment. Magdeburg. l. 3. C. 3. Aperto epistomio aër tanta vi irrumpebat in globum cupreum, ut vel hominem ex opposito stantem quasi ad se rapere videretur. Admoventi os satis eminens, impediabatur respiratio; nec sine periculo quisquam manum su-

per

*per epistomio extendere poterat ne cum vehementia attraheret.*

## XXXI.

Ut autem nunc porro ad alterum objectionis caput accedamus, quo si vel maxime aër premat, eam tamen pressionem gravitatem male dici quia scilicet omnis pressio non est à gravitate. Quis negat? Sed tamen hanc pressionem gravitatem dicendam esse existinavi semper, quæ oritur ex descensu corporum sublunarium versus centrum telluris. Sic merito eam aquæ vim qua descendendo deorsum aliam aquam minus pressam cogit aut ascendere aut Tubum sæpius nobis memoratum superiora versus premere, gravitatem dici & eam pressionem qua aër lateralis deorsum ruens, aërem Sphæræ orificio subjectum in Sphæram cogit, gravitatem merito vocari censui. Quod si tamen hanc vocem huic pressionem applicare quis nolit, cum colitem non movebo, modo fateatur, hanc qualemcumque pressionem motui aëris deorsum deberi.

## XXX:

Neque hærebo ulterius in iis, quibus objiciunt aërem aque inferno ac superne premere, & denique si hoc à gravitate fieret tantillum aëris qui educitur respondere suo pondere debere iis que Sphæra appenduntur, tum quia hæc ipsa nil nisi supinam demonstrant rerum mechanicarum

ignorantia tum quia per ea quæ & hac & præcedenti disp. allata sunt, hæc sponte sua corruunt. Ostendimus enim infernam pressionem ex lege gravitatis liquidorum corporum necessario sequi. Demonstravimus illum aërem qui educitur sua gravitate ad rem nihil facere, atque adeo planum fecimus hæc objectiones nostræ assertioni nihil officere.

## XXXIII

Qua de re si quis nondum omnem scrupulum animo exegerit, cogitet ille nostram Sphæram aëre plenam in aquas demitti, orificio versus inferiora posito, Nonne si modo in altera parte apertio sit per quam aër possit elabi, statim aqua ascendet, & Sphæram occupabit? nonne idem fiet si orificium versus latera aut versus inferiora aperiat? Quid igitur? Aquæ non est gravis, quia æque inferne ac superne irruit? An vero ea irruptio non debetur gravitati, licet sequatur ex legibus gravitatis quas fluida quævis corpora observant? Quæ duo si absurda sint ubi de aqua agitur, si aqua licet gravis æque inferne superne ac versus latera premit Sphæram, quis non videt meram imperitiam esse, ex eo quod aër tam superne quam inferne premit Sphæram & in eam apertam irruat concludere velle aut aërem non esse gravem, aut hanc pressionem non ascribendam gravitati.



## XXXIV.

Nec est quod quis asserat, ubi Sphæram in aquam conjicio me exigere aperturam in superiori Sphærae parte, per quam aër elabatur, quod tamen nostro in casu in Sphæra nullum est. Nihil enim est perceptu facilius, quam aquam Sphæram ingredi non posse nisi aërem ex Sphæra expellat, qui cum per poros Sphærae propter eorum exiguitatem transire nequeat, quid clarius quam aperturam requiri, per quam elabatur? Hæc autem nostro in casu necessaria non est, cum pori Sphærae, ut materiae subtiliori facilem ingressum educto aëre, sic ex eadem, aëre Sphærae rursus reddito facilem egressum præbeant. Hoc autem orificium quod exigimus nihil aliud ad rem facere, quam ut transitum det aëri, qui aquæ cedit irruenti, vel ex eo manifestum est, quod non ideo assurgat aqua quia aër abit, sed ideo expellitur aër, quia ascendit aqua. Cur autem illa ascendit? Quia lateralis aqua non aërem, sed aquam aëre graviolem supra se habens, atque ideo majori vi pressa descendit, sicque eam quæ orificio subjicitur ascendere & Sphærae cavitatem occupare cogit, idque ea vi ac impetu, quæ respondet lateralis aquæ gravitati. Non enim ulterius ingreditur Sphæram aqua, quam ad eandem cum externa aqua altitudinem, quæ quo major est eo majori & vi & quantitate

irruet aër. Quæ sane omnia facile nostro negotio applicare est, ita ut operæ pretium non existimem hisce diutius inhærere. Et tædet sane plura hac de re scripsisse, vereorque merito ne peritioribus gravis sim, quod hisce quibus nescio certe an quidpiam ineptius imperitiufque excogitari queat, refutandis tantum operæ posuerim. A quibus facti mei id circo culpam deprecor, certus ab iis in posterum manus abstinere. Ut enim ingenue dicam quod res est, eorum qui sese similibus ineptiis capi patiuntur, judicia nihil moror.

## XXXV.

Aërem *grauem* esse, hujusque suæ affectionis in firmissima illa binorum Hemisphæriorum solo cera conclusorum cohæsione effecta ostendere, dubitabit, opinor, nemo, qui ea quæ in superioribus à me disputata sunt, plane intellexerit. Quam ob causam hoc argumentum ulterius mihi prosequendum non ducerem, nisi vereretur ne inveteratum illud multis à sæculis *Suctionis & Vacui fuga* præjudicium eam haberet apud nonnullos efficaciam, ut vel firmissimis demonstrationibus fidem detraheret. Neque vero me absque causa hoc in metu versari, persuadet sibi quispiam, si quantum polleant præjudicia, quantasque tenebras animo offundat, probe perceperit. Quod vel ex hac re elucere poterit; Nam cum nihil facilius sit, si paululum modo ad ipsam rationem

nem attendamus , quam animadvertere , nullam *suctionem* nullamve *Vacui fugam* in tota rerum universitate concipi , nedum reperiri posse , ita tamen hæc notio vulgarissima ple-  
 rorumque non ex vulgo tantum , sed ex præ-  
 stantissimis Philosophis , imo totius illius cele-  
 bratissimæ Philosophorum sectæ, quæ *Peripate-  
 tiorum* gaudet appellatione , mentes occupa-  
 vit , ut innumerabilium effectuum causas  
 huic *Suctioni* & *Vacui fuga* ascribant , hanc ut  
*Chimaram* frequentissime & in ore & in animo  
 habeant , eaque ad hujus de qua agimus co-  
 hæſionis explicatione utantur , quin imo in ea  
 sibi ita placeant , ut gloriari non dubitent vel  
 ex hoc solo exemplo patere , quantum *Peri-  
 patetica Philosophandi ratio* præ *mechanicâ* ex-  
 cellat.

## XXXVI,

Quamobrem non omnino abs re fore ar-  
 bitratus sum , si figmentum hocce, quam nul-  
 lius valoris forte , patefacerem , idque de-  
 monstrando primum ipsa ex Natura rei, atque  
 adeo à priori , ut loquuntur , omnem *suctio-  
 nem* ut & *Vacui fugam* naturæ corporeæ, ejus-  
 que proprietatibus plane repugnare. Deinde  
 ostendo , si vel maxime *Vacui fuga*, cui *Suctio-  
 nis* negotium affine est , in rerum natura  
 daretur , hoc tamen Hemisphæriorum casu  
 eam nihil posse.

## XXXVII.

Quæ ut certa via & ratione deducantur, explanandum primum est quamnam habeamus *Suctionis* notionem, & quonam illa modo à *Pulsione* distet. Vulgaris ea est opinio, duo dari motus genera, *Pulsionem*, *Attractionemque*, cujus species quædam sit *Suctio*. *Pulsionem* vocant, ubi corpus, quod tanquam causa motus in alio corpore spectatur, vel quiescit, dum alterum quod impellere dicitur, ab eo recedit, vel movetur ad motum concitat id corpus, cui suo in itinere occurrit. Ubi vero ipsum corpus, quod causa motus in alio corpore supponitur, vel quiescit, alio illo corpore ad ipsum accedente, vel præcedit altero illo corpore quod movere concipitur consequente, omnes *Attractionem* vocabunt. Præter quas duas motus species nullam aliam dari posse manifestissimum est attendenti. Prioris *pulsionis* exemplum est, in Magnete, qui licet ad sensum certe quiescat, alium tamen Magnetem ipsum similibus polis spectantem à se abigit, propellitque; ut in eodem Magnete, cum ferrum attrahere & ad se allicere dicitur prioris *attractionis* exemplum est manifestum. Posterior vero *pulsionis* species spectatur infinitis in casibus, ita ut exempla adducere necessum non sit. *Attractiones* vero primario patent in Antliis, in quibus embolo, qui motus aquæ censetur causa, adducto sequitur pone ipsa aqua.

Qui-

## XXXVIII.

Quibus de rebus quid censendum sit, ut constet, considerari primum velim nullum corpus à semet ipso moveri. Nam cum in corporis natura motus non involvatur, cumque quodlibet corpus, cujuscunque figuræ aut magnitudinis absque motu concipere valeam, quid certius quam ex nullius corporis natura motum fluere? Si enim ullum corpus sit, quod causa sit sui motus, nonne ut effectum causam, sic motus hujusce corporis naturam sequeretur necessario? Cui rei consequens est illud corpus in perpetuum motum iri, nec sine motu concipi posse. Ut enim nulla res sine sua natura, aut esse aut omnino cogitari potest; sic certe nec corpus, si ejus naturam sequatur, eamque ideo necessario comitetur motus, sine illo motu aut esse, aut percipi posset. Quæ cum de corpore absurdissima sint, patet sane de natura corporis motum non esse, sed omnem, qui inest corpori ab alio, hoc est, à causa externa esse.

## XXXIX.

Dum itaque nullum corpus movetur à semet ipso, patet causam motus qui in uno est corpore necessario in alio corpore quarendam esse. An enim & quo pacto res incorporeales motum dare possint inquirere hujus loci non est, cum de motibus solummodo agamus

mus corporeis. Ex quo sequitur, id quod movet, necessario quoque moveri. Nemo enim comprehendet, ut opinor, corpus quiescens aliud impellere, movereque ulla posse ratione. Etenim aut distabit corpus quiescens ab eo, quod in motum concitat aut continget proxime. Prius certe non fiet, quia *nulla actio in distans*, ut vulgatum & certum habet axioma, *dari potest*. Neque posterius; Etsi enim contingat proxime, cum tamen sua quiete in id non agat, non certe movebit. Nam quid certius, quam eodem ritu ac motus causa est omnis in corporibus mutationis, ita quietem causam esse cur corpora in eodem statu perseverent. Ex quo illud conficitur priores species tum *attractionis* tum *pulsionis*, in quibus corpus quiescens aliud vel ad se allicit vel à se propellit, manifestæ repugnare rationi.

## X L.

Posteriorem vero quod spectat *attractionis* speciem ea facillima intellectu est, & revera à *pulsione* non differt, si duo corpora, quorum alterum alterum trahere & tractione ad motum concitare dicitur, vinculo quopiam inter se connexa sint. Nam quid clarius, quam si catenula duo corpora inter se vincta consideres, non posse alterum propelli, quin ea ipsa propulsione moveatur alterum? Quid præterea manifestius quam hanc *attractionem* à *Pulsu* non differre? Ut enim hic fiat motus necesse, ut alterum impellatur, idque ea  
 effica-

efficacia , qua utrumque impelli & moveri possit. Hanc speciem attractionis si defensam velint , facile patior , sed alteram illam , quæ proprie *Sustio* appellatur , qua corpus quod movetur sequitur corpus movens , quicum nullo vinculo , nullaque communione conjunctum est , rerum naturam nullomodo pati firmiter assevero.

## X L I.

Neque difficilis est demonstratio , si consideremus nullum corpus aliud movere posse , nisi cum eo partem quandam sui , quem habet , motus communicet , neque posse cum altero motus sui communicare partem , quin tantundem ei decedat. Si enim corpus quod habeat 10. gradus motus alterum moveat , cum nulla causa sit , quæ motum angeat , manifestum est eisdem 10. gradus permanere , & cum antea uni deberentur corpori , nunc duobus illis impartiri , atque adeo quantum alteri accedit , motus , tantundem priori decedere. Quæ decessio cum mutationem inducat corpori moventi , certe non fiet nisi externum corpus moventis statum & conditionem immutet , hoc est , ei statui , conditionique obicem ponat. Unde sequitur nullam omnino corpus aliud movere quod sine moventis mutatione fieri nequit , quin id quod movetur moventis aut motui aut determinationi impedimento sit. Si enim  
remo-

remora nulla sit quominus in suo statu suoque in motu progrediatur, certe ex statuta jam regula, qua nulla mutatio à se fit, manebit suo in statu, nec quidquam ei de suo motu decedet ac proinde aliud non movebit. Cui si addamus nullum corpus alterius aut motui aut determinationi impedimento esse, nisi situm sit in eadem linea per quam, & easdem partes versus quas corpus fertur, non video quid demonstrationi desit. Hoc autem ipso quid evidentius? Eritne quispiam, qui sibi persuadeat id corpus quod vel pone est vel versus latera, extra viam ejus quod movetur, impedimento fore ejus aut motui aut determinationi? Eadem certe facilitate sibi quispiam persuadebit globum qui ex tormento orientem versus exploditur, sisti in suo motu posse à mœnibus quæ occidentem versus adeoque à tergo sunt, quo nihil absurdius. Hinc cum nullum corpus alterum moveat nisi quod sibi remoræ sit, nullum vero alterius motui obistere queat, si extra viam sui motus, hoc est, vel à tergo vel à lateribus sit, quid aliud sequitur, quam illud corpus quod à tergo est ab eo quod præcedit, nulla ratione motum iri? sive, quid aliud sequitur, quam corpora naturalia nullam omnino aut *suctionem* aut *attractionem* agnoscere.



## XLIII.

*Suctione* autem *Attractione*que hoc modo ever-  
sis corrumpitur simul *vacui fuga* quæ *Suctione* tan-  
quam fundamento nititur. In qua confutanda  
primum id urgebo obiter, hanc *vacui fugam*  
effectum dicere non causam, nisi corpora na-  
turalia prædita esse velint consilio & ratione.  
Quid enim quæso sibi vult, aquam in antliis  
ascendere propter *metum* & *fugam vacui*, nisi  
aqua percipiat spatium, nisi ascendat inane  
fore, hocque aut sibi aut universo maximam  
creaturum noxam. Aut enim *fuga* hæc deno-  
tat motum, qui fit ex consilio & ratione,  
sicque ea utuntur corpora, quæ aut fugere  
aut fugare dicuntur, aut tantum denotat mo-  
tum aquæ sine consilio, sicque effectum dicit,  
non causam. Quæritur cur ascendat aqua,  
quia fugit, ne detur vacuum. Hoc itaque fu-  
gere, aut est moveri propter eum finem, quem  
bonum esse novit, quod quid est quam ratio-  
ne uti? aut est tantum moveri versus superio-  
ra, eoque motu omne inane spatium exclu-  
dere; quod nihil aliud est, quam ascendit aqua,  
quia superiora versus fertur; quæ egregia  
prorsus est phænomenum explicandorum ra-  
tio. Deinde si vel maxime ipsis demus con-  
silio quodam duci aquam hoc in ascensu, &  
publicum bonum privato anteponere, (Vi-  
dentur enim hæc in parte, non tam imitari,  
quam superare velle mythographorum fabel-  
las, qui bestias solummodo inducunt loquen-  
tes,

tes, cum nostri ipsa etiam corpora inanimata supponant ratiocinantia) nihil tamen hoc ipso absurdo dato exponitur. Homo quispiam in medio hostium constitutus, eorumque five numero five valore perterritus fugit; dici id potest, sed idem si de statua aut alia quavis re inanimata diceres, ut nostri de aqua, nonne temet ipsum ludibrio exponeres? Verum detur hoc, fugit Aqua Vacuum, hostem vel suum vel rerum universitatis; Verum tamen ut ille homo qui fugit, certe non fugeret, si vel paralyticus foret, vel cruribus careret aut non haberet musculos rite præparatos, spiritus debito modo influentes, omnia denique illa organa quæ ad hanc fugam requiruntur, & ex quibus tanquam ex efficientibus causis fuga hæc sequitur necessario, ita certe aqua in antlia, licet habeat maximam propensionem ut ascendat, & cupiditatem fugiendi Vacuum vehementissimam nec ascendet profecto, nisi habeat organa per quæ hanc suam fugam instituat, & quæ veræ hujus motionis sint causæ. Quæ dum non asserunt, quod tamen debebant, de iis enim primario quæritur, effugium tantum in hoc metu quærunt & merum ignorantiaæ azylum.

## X L I I I.

Ne autem longior sim huic rei deducendæ non immorabor diutius ut nec in eo ero; ut ostendam nullum inane spatium concipi posse,  
atque

atque adeo inanem esse eum metum si quis sit idque ex eo, quod in eo spatium detur extensio, detur longitudo, latitudo & profunditas, quæ cum non sint nihil, manifeste arguunt illic rem extensam longam, latam, & profundam, hoc est, corpus reperiiri. Licet enim existimem eam rationem manifestæ & Mathematicæ esse veritatis, prætermittam tamen, quia alia occasione eam deduxi luculentius: Id tantum notabo, eos qui hanc *Vacui fugam* propugnant aut statuere inane spatium reperi naturalibus de causis, aut non reperiiri. Si prius, non est certe quod natura sibi de vacuo metuat, cum id ipsum producat, efficiatque: sin posterius, multo magis ridiculus est Naturæ hic terror cum nullum unquam Vacui possit esse periculum, si causæ naturales id nequeant producere. Deinde si existiment Vacuum quidem naturaliter nullum dari, posse tamen dari, revera pugnantia loquuntur, & veræ ratiocinandi viæ planè contraria. Nullum enim vacuum naturaliter dari cum asserunt, aut id certis argumentis ducti asseverant, aut temere illi assensum præbent, quo nihil turpius Philosopho. Si vero certis argumentis ducantur, aut ea hauserunt experientia, quod fieri non potest, cum ea singularium ex quibus nullum universale effatum potest cognosci; Et quæ sane experientia probabit, nec in cœlorum vastissimis spatiis, nec in telluris profundissimis penetralibus

D

quid-

quidpiam inanis reperiri. Aut quod unicum superest, rem percipere ratione. Quod si sit necesse est ut id sequatur necessario aut ex natura corporis, aut ex natura universi. Quo posito sane Vacuum non tantum non datur, sed certe nec dari potest, cum ea, quæ naturam rei sequuntur à re abesse nequeant. Postremo id quæso considerent, nunquam ulla vi spatium inane produci posse, si unquam constituent omnia corporibus fuisse plena. Etenim cum nulla penetratio corporum queat dari, si omnia hoc tempore plena sunt semper plena servabuntur. Si enim situm hoc corpus mutet cum id fieri nequeat nisi aliud expellendo, sequetur illa corpora expulsa necessario id spatium quod alter dereliquit rursus repletura. Imo supponamus si ita velint vacuum aliquod produci, quod conficiat ex gr, decimam partem totius: Nonne itaque illa corpora quæ antea replebant totum spatium, nunc vacuo illo producto replebunt tantum  $\frac{9}{10}$  istius spatii, atque adeo se ipsis erunt minora? Simili modo, si supponatur aliquod inane nunquam poterit tolli. Ut enim tollatur deberent corpora quæ essent æqualia  $\frac{9}{10}$  ex gr. ipsius spatii, fieri æqualia toti, atque adeo se ipsis majora. Quo nihil à ratione alienius fingi potest. Si itaque vacuo unquam dato nunquam possit evitari aut non dato, nunquam possit confici, quid est absurdus

dius

dius, quam Sapientissimam prudentissimamque, ut fingunt, Naturam id insipienter satis vel metuere, quod fieri nequit, vel evitare conari, quod evitari nullo modo potest.

## X L I V.

Quæ ut globo nostro, quod alterum caput est; breviter applicentur, manifestum certe est si nulla detur *suctio*, nulla *Vacui fuga*, nec ad hæc tanquam hujus effecti causas respiciendum esse. Deinde & id liquet, si vel *fuga vacui* concedatur, explicandum tamen esse, quibus organis, instrumentisque id ipsum efficiat *Natura*. In quo dum hærent nihil profecto agunt. Denique liberaliter agamus cum illis, concedamus omnia quæ volunt, videamusque an hoc in casu satis convenienter suæ ratiocinentur Hypothesi. *Metus Vacui* in causa est hujus effecti, ergo necesse certe est, ut aliquod periculum vacui detur, ne velint suam illam Naturam turpiter Panico terrore transversam agi. Ex quo autem illud periculum? Certe non nisi ex arcta Hemisphæriorum conclusione. Quid itaque ager *Natura* si recte sibi consulere velit? Concludetne Hemisphæria? Nihil minus: Sic enim procuraret id quod summopere evitatum vult; Quid itaque? Avelleret sane, si saperet, ea a se; Sic enim certum est nullum inanis spatii fore vel minimum periculum. Quod cum non faciat, nonne manifeste sequitur sese hisce Philosophorum ratiunculis non astringere rerum naturam.

## X L V.

Deinde illud spatium quod est intra globum aut inane est, sicque ut dixi hemisphæriorum avulsionem, qua illud tolli posset procurare oporteret Naturam, aut est corpore aliquo plenum, quo ipso nullum est vacui periculum, nisi forte in ipsa avulsione. Quæ si possit fieri absque vacuo stultum rursus est, id metueret; sin vero absque eo fieri nequeat ipsa Natura sibi met ipsi suis viribus, sua efficacia id producat, quod tamen omnibus viribus evitatum vult. Pondera etenim, quæ hemisphæria avellunt, sua naturali agunt gravitate, Naturæ viribus deorsum pelluntur, atque adeo quidquid etiam producat sive boni sive mali, Naturæ, ejusque viribus merito ascribitur. Estne itaque Natura sibi ipsi contraria? Altera parte ne vacuum fiat, ut volunt, Hemisphæria connectit, altera suis viribus avellendo Hemisphæria id agit ut vacuum, si qua ex ea avulsione sequatur, producatur necessario.

## X L V I.

Plura quod facile possem hac vice non addam, ne in re plana aperta que sollicitus nimis esse videar. Suffecerit enim ostendisse ex ipsa corporis Natura, Suctione nullam rem peragi Demonstrasse sive putemus inane spatium dari sive minus, id Naturam ju-  
re

re non metuere, cum in priori casu id Naturæ rerum conveniat, in posteriori produci nequeat; Planum denique fecisse, si vera forent omnia quæ assumunt longe aliud præstare nostro in casu Naturam oportere, quam quod facit, atque adeo aut delirare eam si eorum ratio à qua deflectit vera sit, aut eos suis in ratiociniis à Naturæ tramite aberrare. Quod patefacere hac in Disputatione mihi erat propositum.

## XLVII.

Hactenus in eo fui primum, ut ex binorum hemisphæriorum sola cera conjunctorum arctissima, quæque educto aëre sine magno appenso pondere solvi negat, cohæsione ostenderem notabilem aëris tellurem nostram ambientis gravitatem? Deinde, ut simul patefacerem objectiones contra hanc opinionem propositas, meram Mechanicæ prodere imperitiam, imo unci deberi ignorationi ejus viæ, qua hanc cohæsionem à gravitate aëris fieri juxta certas & necessarias Mechanicæ leges demonstrant illi, qui eam rem propugnant. Denique ut *suasionem, vacui fugam*, similiaque *Peripateticorum* figmenta, quibus ad similitum Phænomenum explicationem frequentissime utuntur, rerum naturæ rectæque rationi quam clarissime repugnare, imo si vel omnia ipsis dentur, quæ assumunt, mera ignorantiae asyla esse, quam certissime evince-

cærem. Neque deessent multa id genus experimenta, quibus eadem illa gravitas luce meridiana redderetur clarior, quæ tamen ne nimia forte prolixitate tædio sim, proponere supersedeo. Unicum enim, quod jam excutere animus est, sufficiet ut opinor, ad hanc rem ita manifestandam, ut ne stupidissimo cuiquam mortalium dubia amplius esse queat Aëris gravitas. Eam enim exhibebo vobis ad trutinam & libram ita expensam, ut nullus ulli subterfugio relinquatur locus.

## XLVIII.

Hoc autem experimentum, quod ante annum & quod excedit publice ostendi, eam ob causam propono lubentius, quia non tantum in genere gravem Aërem demonstrat, sed & *data cujuscunque massa aërea certam gravitatem & definitum pondus determinat.* Qua in re usus sum balance accurata, quæ etiam si vel 25. aut 30. &c. lb utrique imponerentur lanci, grano uno alterove addito demotove, in hanc illamve partem manifesto propenderet. Nisi enim exactis utamur bilancibus frustra certe erimus in examine tantilli ponderis, quod exhibet nobis Aër. Hisce itaque exploravi pondus binorum hemisphæriorum cera occlusorum, idque aëre nondum educto, ut nimirum si inter hocce sphæræ pondus aëre repletæ, & ejusdem aëre vel in totum, vel maxima ex parte  
vacuæ



vacuæ discrimen quoddam animadverteretur, certo constaret id aëri educto deberi. Sphæræ itaque aëre refertæ pondus fuit lb vii.  $\overline{3}$ i.  $\overline{3}$ ij. gr. xlviii. Hinc nulla omnino re sive addita sive demta, ope Antliæ Pneumaticæ aërem eduxi, occlusamque, ut ante, Sphæram imposui uni lanci, dum alteri adderetur idem pondus, quod sphæræ aëre refertæ æquiponderare exploraveram. Profecto si nullum Aër obtineat pondus necesse foret ut rebus ita constitutis in æquilibrio hæreret bilanx. Nihil enim sphæræ decesserat præter Aërem quem ponderis expertem volunt. Sed quid factum? Lanx illa, quæ pondus continebat, deprimi, illa vero, quæ sphæram, attolli cœpit, manifesto indicio, cum altera lanx non facta esset gravior, alteram demto aëre factam esse leviorum. Aëremque idcirco gravitatis esse participem Neque vero ad æquilibrium reduci res potuit, nisi demta parte ponderis, quod in altera lance continebatur, Et demere quidem oportuit  $\overline{3}$ i. gr. xvii. Hujus quippe sphæræ aëre tantum non prorsus vacuæ pondus exploratum fuit in eadem bilance lb vii.  $\overline{3}$ i.  $\overline{3}$ i. gr. xxxi. Differentia itaque est, ut dixi,  $\overline{3}$ i. gr. xvii. quod certe pondus satis notabile est, si pauculam illam Aëris quantitatem spectes, quæ in sphæra, cujus diameter vix viii. digitorum est, contineri potest. Tota enim hæc sphæræ cavitas, si eam perfecte rotundam

& penitus aëre exinanitam, vix accedit ad sextam pedis cubici partem, ut notum est Geometris.

## X L I X.

Qua ex re ut sane Aëris gravitas constat manifestissime, ita nec minus clare liquet, si tantillula Aëris pars, quæ sextam pedis cubici partem non æquat, ejus sit ponderis, quod 3i excedat, mirum nequaquam esse cylindrum aëreum, cujus basis sit diametri digitorum viii. circiter à nobis ad supremum usque Athmosphæræ, per multa milliaria extensum premere corpora hæc inferiora eo pondere quod 600. aut 700. lb excedat, Quicquid autem hujus rei sit, de qua ante egimus, hoc certe, nisi fallor, efficiet hoc experimentum, ut nemo futurus sit, nisi qui & rationi & sensibus repugnare velit, qui Aërem utpote alterum ex levibus elementis, ut vulgata Peripateticorum fert opinio, levem statuatur, huncque superiora petere affirmet, cum planum factum sit, hanc vim, qua deorsum aër premitur, quam nemo Gravitationem dicere dubitabit, vel statim expendi posse.

## L.

Ut autem nunc porro certam Aëris in data quantitate gravitationem possem discernere, eandem hanc sphaeram aëre, ut dixi, tantum

tum non vacuum immisi in aquam, ut orificium, quod aperiri claudive poterat, sub aquis foret. Quo in statu aperto orificio aqua magna vi irruit in cavitatem sphaeræ, eamque non quidem totam, tantillum enim aëris necessario relinquendum fuit, sed partem, quam aëre orbaveram, occupavit. Id autem spatium ab aqua occupatum esse ex variis liquet indiciis. Primum enim ipsa ratio docet, eosque ascendere oportere aquam, quamdiu illa quæ extra orificium Sphaeræ est, ab aëre externo majori premitur vi, quam illa pars aquæ, quæ sub orificio est, quæque non premitur nisi ab illo qui intra Sphaeram continetur, aëre propter longe maximam exhaustam partem admodum dilatato, sicque multo minori vi premente: Quæ inæqualitas pressionis non penitus tolletur nisi ubi Aër intra sphaeram ad eandem cum Aëre externo consistentiam reductus fuerit, hoc est, nisi ubi aqua tenet omne illud spatium, quod antea aër exhaustus occupaverat. Deinde vel experientia idem evincet in vasis vitreis. Illa enim ostendet semel mota, adeoque parte quadam aëris exhausta, si orificium vasis immergatur aquæ, aperiaturque, aquam ascendere & penetrare vas vitreum, sed solummodo ad id usque spatium, ex quo demtus fuit Aër. Tum enim omnis cessabit aquæ ascensus. Qui reiterabitur, si nova facta aëris exhaustione, orificium rursus aquæ indatur, aperiaturque. Ita

enim sensim pro modulo exhaustionis, aqua vas penetrabit, idque tandem pluribus factis aëris exhaustionibus tantum non totum explebit. Qua via præter plures alias faciliores commodioresque, cognosci potest quantum Aëris ex vase aliquo demtum sit. Tantum quippe demtum erit, quantum spatii Aqua occupabit. Ex quibus itaque conficitur Aquam sphæram nostram penetrantem, occupaturam exacte id spatium, quod antea occupabat Aër; quod idem dignoscitur ex eo, quod demta ex aqua sphæra aperto orificio nullus sibilus penetrantis anidmadvertatur Aëris. Si enim pars quædam istius spatii, quod tenuerat aër, aqua foret vacua necessario sequeretur, ut aër versus interiora per angustiam orificii penetrans suo motu sibilum excitaret qui nunquam decesse solet, si sphæra ante aquæ cessantem ascensum, hoc est, ante omne illud spatium Aëre vacuum occupatum ab aqua. extra aquas aëri exponeretur. Qui itaque cum nullus hic adfuerit, certum erit omne hocce spatium ab aqua occupatum fuisse.

## L I.

Qua re cognita omnem madorem ab externa sphære superficie sollicitè abstergi curavi, ne illa ullum sphære pondus adderet. Hinc exploravi rursus pondus sphære aqua jam repleta, quod fuit lb. xvi. 3. xii. 3. vii. gr.

gr. xiv. Ex qua sane observatione non arduum est determinare, quam gravitatem habuerit eo tempore pes cubicus Aëreus circa Telluris superficiem:

## LII.

Etenim pondus ipsius sphaeræ aëre admissio repertum fuit lb. vii,  $\overline{31}$ ,  $\overline{311}$ , gr. xlviii, eodem exhausto. lb. vii.  $\overline{31}$ ,  $\overline{31}$ . gr. xxxi. Aër itaque eductus fuit gravitate  $\overline{31}$ , gr. xvii. Idem autem illud spatium, quod aër ille replevit, postmodum occupavit Aqua, deditque pondus ut dixi, lb. xvi.  $\overline{3xii}$ .  $\overline{3vii}$ . gr. xiv. A quo si demas pondus solius sphaeræ lb. vii,  $\overline{31}$ ,  $\overline{31}$ , gr. xxxi, restabit pondus aquæ, quod aëris educti occupavit locum lb. ix,  $\overline{3xi}$ ,  $\overline{3v}$ , gr. xliiii. Ex quibus cum constet, gravitas Aëris & aquæ æqualium massarum, utpote idem spatium occupantium, facile certe erit inter gravitatem Aëris & Aquæ comparationem instituere, Aquæ quippe hujus gravitas est gr. 74743, Aëris vero gr. 77. ut ex sequenti liquet calculo

$\begin{array}{r} 16 \\ \hline \overline{3155} \cdot \overline{35}, \text{gr. } 43. \\ 8 \\ \hline \overline{31245} \cdot \text{gr. } 43. \\ 60 \\ \hline \text{gr. } 74743. \end{array}$	$\begin{array}{r} \text{pondus Aëris } \overline{31}, \text{gr. } 17. \\ \hline 60. \\ \hline \text{gr. } 77. \end{array}$
---	--

Un-



vitas atque ideo etiam Aëris compressio vel major vel minor est; prout vel in terræ cavitatibus profundius descendimus vel in montium cacuminibus altius assurgimus. Deinde quia eadem illa Athmosphæra, atque ideo & Aër ejus gravitatem sequens pro diversis tempestatibus, nunc gravior nunc levior est, ut ex *Barometris*, quæ Mercurio suspenso Aëris gravitati æquiponderant, liquere potest. Nonnunquam enim in illis descendit Mercurius si pondus Athmosphæræ fiat minus, nonnunquam ascendit, si pondus aëris fiat majus. Quæ tamen differentia gravitatis licet in tota Athmosphæræ massa satis sit notabilis, in ea tamen quantitate pedis cubici, de cujus gravitate determinata hic loquimur, considerari vix meretur. Id etenim observatum est maximam altitudinis, ut *Wallisus* refert, differentiam fuisse digitorum atque adeo vix confecisse circiter  $\frac{1}{5}$  totius gravitatis. Ex quo sequeretur si ad illas minutias attendere velimus, maximam differentiam gravitatis, quæ intercedit inter Aërem levissimum, & gravissimum in pede cubico fore circiter drachmæ dimidiæ. Hæc enim unciaë quintam decimam circiter conficit partem.

## LV.

Ex quibus omnibus, ne longior sim, manifestissime confici existimem id quod demonstrandum mihi proposueram, *Aërem gravem esse*, ita ut plura, quod facile possim, in eandem rem

experimenta addere opus non censeam. Aut enim hæc suffecerint, aut quod sufficiat erit nihil. Obiter autem id solummodo monebo utilitatem hanc cognitionem in variorum explicatione phænomenum habere maximam. In omni enim Suctionum Attractionumve quod vocant genere, in Antliis & sexcentis similibus hæc gravitas Aëris tantum potest, ut ea admilla illa omnia facillime, ea negata, nulla ratione explicari queant. Quis enim quæso non percipiat aquam adducto embolo in Antliis necessario ascensuram, si concipiat Aquam extra Antliæ tubum premi ab omni aëris imminētis gravitate, eam vero quæ intra tubum est, cum nullum Aëris inter se & embolum positi pressionem habeat, exteriori illi pressionī necessario cessuram? Quis non animadvertat ascensum illum Aquæ necessario terminatum iri, ubi ipsa Aquæ intra tubum Ascendentis gravitas atque adeo etiam ejus pressio æquivalet gravitati Aëris externi? Unde & patebit ratio cur Mercurius assurgat ad 28, 29. digitos, Aqua vero in Antliis ad pedes 33, 34, cum hæc ipsissima sit proportio gravitatis quæ inter duos est liquores, quam aliunde novimus esse, ut 14. ad 1. Quæ certe omnia ita necessario ex Aëris gravitate cognita sequuntur, ut vel ex eo pateat hanc unicam omnium harum rerum causam esse necessariam. Qua de re forte alias latius.

F I N I S.









